

## **Воскресные стихиры на хвалитех, глас 2:**

**Хвалите Бога во святых Его, // хвалите Его во утверждении силы Его.**

Да рекут иудее, како воины погубиша стрегущи Царя? / почто бо камень не сохрани Камене жизни? / Или Погребенного да дадут, / или Воскресшему да поклонятся / глаголюще с нами: слава множеству щедрот Твоих, // Спасе наш, слава Тебе.

**Хвалите Его на силах Его, // хвалите Его по множеству величества Его.**

Радуйтесь людие и веселитесь, / ангел седяй на камени гробнем, / той нам благовести, рек: / Христос воскресе из мертвых, Спас мира, / и исполни всяческая благоухания: // радуйтесь людие и веселитесь.

**Хвалите Его во гласе трубнем, // хвалите Его во псалтири и гуслех.**

Ангел убо еже радуйся, / прежде Твоего зачатия, Господи, Благодатней принесе: / ангел же камень славного Твоего гроба в Твое воскресение отвали: / ов убо в печали место, веселия образы возвещая: / сей же в смерти место, Владыку Жизнодавца проповедуя нам, / темже вопием Ти: // Благодетелю всех, Господи, слава Тебе.

**Хвалите Его в тимпане и лице, // хвалите Его во струнах и органе.**

Возлияша мира со слезами на гроб Твой жены, / и исполнишася радости уста их, // внемда глаголати: воскресе Господь.

**Хвалите Его в кимвалех dobroгласных, хвалите Его в кимвалех восклицания. // Всякое дыхание да хвалит Господа.**

Да похвалят языцы и людие Христа Бога нашего, / волею нас ради крест претерпевшаго, / и во аде тридневновашаго: / и да поклонятся Его из мертвых воскресению, // Имже просветишася всего мира концы.